

四庫全書

集部

欽定四庫全書

文章辨體彙選卷三十二

明 賀復徵 編

祝文一 告辭

徐師曾曰按祝文者饗神之辭也劉勰所謂祝史陳信資乎文辭者是也昔伊祈始蜡以祭八神此祝文之祖也厥後虞舜祠田商湯告帝周禮設太祝之職掌六祝之辭春秋以降史辭浸繁則祝文之來尚矣

考其大旨實有六焉一曰告二曰修三曰祈四曰報  
五曰辟六曰謁用以饗天地山川社稷宗廟五祀羣  
神而摠謂之祝文其辭亦有散文儷語之別也 今  
去辟謁二體

周武王筮祝文

武王既定商立於社南大卒之左右畢從毛叔鄭奉明  
水衛康叔封布茲召公奭贊采師尚父牽牲尹佚筮祝  
曰殷之末孫季紂殄廢先王明德侮蔑神祇不祀昏暴

商邑百姓其章顯於天皇帝於是武王再拜稽首曰

膺更大命革殷受天明命武王又再拜稽首乃出

孫鑣曰箕

大上帝句連下膺更蓋讀至上帝句武王再拜稽首讀畢又再拜稽首也霍光傳廢昌邑王尚書令讀奏至中太后曰止王離席伏復讀法本此寫狀態如觀

### 漢光武帝告天地羣神文

皇天上帝后土神祇眷顧降命屬秀黎元為人父母秀不敢當羣下百辟不謀同辭咸曰王莽篡位秀發憤興兵破王尋王邑於昆陽誅王郎銅馬於河北平定天下

海内蒙恩上當天地之心下為元元所歸識記曰劉秀發兵捕不道卯金修德為天子秀猶固辭至於再至於三羣下僉曰皇天大命不可稽留敢不敬承

漢昭烈皇帝祭告天地神祇文

維建安二十六年四月丙午皇帝備敢用玄牡昭告皇天上帝后土神祇漢有天下厯數無疆曩者王莽篡盜光武皇帝震怒致誅社稷復存今曹操阻兵安忍僂殺主后滔天泯夏罔顧天顯操子丕載其凶逆竊居神器

羣臣將士以為社稷隳廢備宜修之嗣武二祖躬行天  
討備雖否德懼忝帝位詢於庶民外及蠻夷君長僉曰  
天命不可以不荅祖業不可以久替四海不可以無主  
率土式望在脩一人脩畏天明命又懼漢邦將湮於地  
謹擇元日與百寮登壇受皇帝璽綬修燔瘞告類於天  
神惟神享祚於漢家永綏四海

潮州祭神文

唐韓愈

維年月日潮州刺史韓愈謹差攝潮陽縣尉史虛已以

特羊庶羞之奠告於太湖神之靈愈承朝命為此州長  
今月二十五日至治下凡大神降依庇貺斯人者皆愈  
所當率徒屬奔走致誠親執祀事於廟庭下今以始至  
方上奏天子思慮不能專一冠衣不潔淨與人吏未相  
識知牲糈酒食器皿摘弊不能嚴清又未卜日時不敢  
自薦見使攝潮陽縣尉史虛已以告神其降監尚饗

祭淮瀆文

元稹

維元和九年歲次甲午十二月朔甲辰某日辰使謹遣

某用少牢醴酒之奠昭禱於淮瀆長源公之靈浩浩靈  
源滔滔不息流謙處順潤下表德清輝可鑒浮穢不匿  
月映澄鮮霞明渙灑經界區夏左右萬國百川委輸萬  
靈受職越海貢誠載舟竭力明哲用興凶戾潛殛眇爾  
吳頑蔑然蝨賊鴟張蔡郊蟻聚淮側喪父禮虧于君志  
愆天子命我滌除妖慝卒乘林林戈鋌嶷嶷電淬爪卒  
雷憤胸臆王心示懷士剪猶抑柔叛綏衷取順捨逆咨  
爾有神逮爾有極彼暴我仁彼枉我直歸我者昌倍我



者辟不斬祠祀不湮溝洫不赦渠魁不虐畏逼不進梯  
衝不燿矛戟火滅燎原人歸壽域然後潔神牛羊奉神  
黍稷告神有成謂神不惑尚饗

祭匡山文

白居易

維元和十二年歲次丁酉二月辛酉朔二十一日將仕  
郎守江州司馬白居易謹以清酌之奠敢昭告於匡山  
神之靈恭惟神正直聰明扶持匡廬福利動植居易賦  
命蹇連與時參差願於靈山棲此陋質遺愛寺側既置

草堂欲居其中參禪養素而開構池宇在神域中往來  
道途由神門外輒用酒脯告虔於神神其聽之歆此薄  
奠非敢徼福所期薦誠尚饗

祭廬山文

白居易

維元和十二年歲次丁酉二月二十五日乙酉將仕郎  
守江州司馬白居易以香火酒脯告於廬山遺愛寺四  
旁上下大小諸神居易夙聞匡廬天下神秀幸因佐宦  
得造茲山又聞永遠宗雷同居於是道俗並處古之遺

風而遺愛西偏鄭氏舊隱三寺長老招予此居創新堂  
宇疏舊泉沼或來或往棲遲其間不唯耽翫水石以樂  
野性亦欲擺去煩惱漸歸空門儻秩滿以來得以自遂  
餘生終老願託於斯今葺構既成遊息方始爰以潔敬  
薦茲馨香不敢媚神不敢禳福但使疫癘不作魍魎不  
逢猛獸毒蟲各安其所苟人居之靜謐則神道之光明  
齋心露誠庶幾有荅尚饗

到任祭城隍文

明袁黃

維萬曆十六年六月初九日禮部觀政進士袁黃奉  
命來知寶坻縣事謹以牲醴致祭於本縣城隍之神曰  
黃不肖數罹大過欲寡之未能也然素有體物恤民之  
志今將實見之行事敬與神約吾願恭順以事上傲慢  
不恭神殛之吾願明潔以事神享祀不潔神殛之吾願  
虛懷樂善以事邑之賢者侮慢自賢神殛之吾願崇儉  
以厚風俗侈食縱酒神殛之吾願寧失不經以活無知  
犯法之民不能活神殛之吾願興民之利而闢其荒蕪

不然者神殛之吾願防民之患而修其溝畛不然者神殛之聽訟則不但剖其曲直必思所以平其忿心而使之無訟不然者神殛之用刑則不但鋤強遏惡必思所以養其良心而使廉恥日生不然者神殛之賦役則不但不敢額外加徵必思所以曲為區處而使額內之數漸減不然者神殛之徭役則不但一時恤民之力必思所以立法調停而使享永世之利不然者神殛之治事則不但發已自盡必思所以循物無違而使衆志皆通

不然者神殛之愛人則不但使居者願耕於其野亦使  
行者願出於其途而無忘賓旅不然者神殛之至於納  
民之賄殘民之命凌虐士類陷害同僚則尤不肖之甚  
者神其速殛毋恕若夫雨暘時若疫癘不侵則神之事  
也予治其明弗及其幽願默賜寵綏以相予之不逮合  
境神祇同此證明尚饗

文章辨體彙選卷三十二

欽定四庫全書

文章辨體彙選卷三十三

明 賀復徵 編

祝文二

修辭

周迎日辭

維某年某月上日明光於上下勤施於四方旁作穆穆  
惟予一人某敬拜迎於郊以正月朔日迎日於東郊

賽蔣山廟文

梁沈約



我皇體天御宇望日表尊備樂變乎笙鏞鬱禮華於俎  
豆邇無不懷遠無不肅烏革玄素之容草移丹綠之狀  
泉露改味日月重光仰惟大王年踰二百世兼四代揚  
玉桴布瑤席秦梁楚趙之巫把瓊茅而延佇燕衛宋鄭  
之音結流風而成曲九嶷之乘蔽日三山之駕若雲

秋賽文 宋曾鞏

歲既順成時方秋歛神能施澤以及物人能備物以事  
神茲惟舊章夫豈敢怠庶其為福無斁於人

己卯春釋菜先聖文 劉因

聖代天言明告萬世寥寥方冊孰傳聖言天啓聖心程  
朱將命埋晦浚闢聾聰昏明謂富後人承此遺澤孰云  
剽盜資我而文肆焉多岐孰謂其一徒為瞻仰有測此  
心某早躁狂若將有志中實晚屈未立以頽揆厥無成  
實由貪懦時馳意去擅不自容顧念此心恍焉如失今  
此闕館惟我之求講學有徒進修有地研窮叅訂亦復  
有書於古遺言於今學者尚有裨益少慰此心但懼悠

悠復循前軌惟神啓迪實有臨之

文章辨體彙選卷三十三

欽定四庫全書

文章辨體彙選卷三十四

明 賀復徵 編

祝文三 祈辭

炎帝伊耆氏蜡祝辭

土反其宅水歸其壑昆蟲毋作草木歸其澤

註云報成  
功於歲終

又以祈來年之始故祝之之辭  
如此宅叶遠各反澤叶遠各反

帝舜祠田辭

荷此長耜耕彼南畝四海俱有

商王成湯禱辭

墨子兼愛篇湯貴為天子然且不憚以身為犧牲以  
辭悅於上帝鬼神

惟予小子履敢用玄牡告於皇天后帝曰今天大旱即  
當朕身履未知得罪於上下有善不敢蔽有罪不敢赦  
簡在帝心萬方有罪即當朕身朕身有罪無及萬方

成湯桑林禱辭

荀子大畧篇湯之時大旱七年剪髮斷爪以身為犧  
牲禱於桑林之野以六事自責言未已大雨

政不節與使民疾與宮室崇與婦謁盛與苞苴行與讒  
夫興與何不雨至斯極也

節叶即盛叶成復微曰此文  
兩句一韻凡三韻末句極字

又叶前兩句韻文紀  
以末句入注非是

### 周立社祝

今某月日君為某立社之祭土而主陰氣也五穀用成  
萬民以生敢用肥腠嘉蔬清酒敬致大神自今日以來

祈請雨止惟靈是聽子孫眉壽萬神含靈

此亦止雨之辭

齊田者祝

甌窶滿篝汚邪滿車五穀蕃熟穰穰滿家

篝籠也汚邪下地田也篝

叶斤敦反家叶攻乎反

蕭太傅東耕祝文

梁江淹

敬祝先穡曰攝提方春黍稷未華灼爍發雲照耀開霞  
地煦景曖山艷水波側聞農政實惟民天競拒獻歲務  
畎上年有滄疎潤興雨導泉崇耕巡索均逸共勞命彼

倌人稅於青臯羽旗銜麤雄戟耀毫呈典緇耜獻禮翠  
壇宜民宜稼克降祈年願靈之降解佩停鑾神之行兮  
氣為輒神之坐兮烟為蓋使嘉穀與玄鬯永爭光而無  
沫哉

請雨詞

陶弘景

華陽隱居陶弘景道士周子良詞竊尋下民之命粒食  
為本農工所資在於潤澤頃亢旱積旬苗稼焦涸遠近  
嗷嗷瞻天雀息百姓祈請永無感降伏聞雨水之任有



所司存願哀憫黔首霈垂霑渥呵風召雲膚寸而合使  
洪潦溢川水陸咸濟則白鵠之詠復興於今共伸至誠  
稽顙陳情謹詞天監十四年太歲乙未六月二十日詞  
詣句曲華陽洞天張理禁趙丞前

唐武宗祈祭西嶽文

唐李德裕

惟神作鎮中土據於西陲積高炳靈宅神明之奧少陰  
協德成天地之功恭聞烈祖玄宗御歷永年祭必受福  
秘礎昭賽金刻猶存近者陰澤稍憊宿種未茂精意纒

達甘液驟零既抒播種之勤已獲流根之潤今因報德  
再竭至誠某纘奉丕圖勤勞七載恭已思道豈敢怠荒  
屬黠虜南侵震驚朔野兵鋒一舉毛毳幕皆焚潞子嬰兒  
梟首魏闕參墟叛將面縛壘門成此武功無非幽贊又  
以釋氏之教出於西夷棄五常之典絕三綱之常殫竭  
財力蠹耗生人黜其異端以正王度庶可復古諒非近  
名屬以忽於所慎寒暑成疾曠時且垂於勿藥昧旦徒  
切於求衣如某政教不明宜有陰譴刑罰不中未合天

心實希明神許其改悔永保宗廟以安邦家所疾日瘳  
平復如舊昔成湯自咎者六零雨消災宋景善言者三  
法星退舍至誠所感前史昭然誠信不欺恃神正直敢  
不誓於丹腑嚴奉明靈敬陳忠懇伏望臨鑒

潮州祈太湖神文

韓愈

維年月日潮州刺史韓愈謹以清酌服脩之奠祈於太  
湖神之靈曰稻既穟矣而雨不得熟以穫也蠶起且眠  
矣而雨不得老以簇也歲且盡矣稻不可以復種而蠶

不可以復育也農夫桑婦將無以應賦稅繼衣食也非神之不愛人刺史失所職也百姓何罪使至極也神聰明而端一聽不可濫以惑也刺史不仁可坐以罪惟彼無辜惠以福也劃劃陰雲卷月日也幸身有衣口得食給神役也充上之湏脫刑辟也選牲為酒以報靈德也吹擊管鼓侑香潔也拜庭跪坐如法式也不信當治疾殃殛也神其尚饗

祭門文 柳宗元

祭於城門之神惟神配陰含德司其翕闢能收水沴以  
佐成績淫雨斯降害於麩麥野人興憂官守增惕諸陰  
既閑休徵未獲敬用瓢齋以展周索納其雲氣覆我川  
澤惟神是依式疇來格

祭城隍神祈雨文

杜牧

下土之人天實有之五穀豐實寒暑合節天實生之也  
苗方甲而水湮之苗方秀而旱莠之饑則必死天實殺  
之也天實有人生之孰敢言天之仁殺之孰敢言天之

不仁刺史也三歲一文如彼管庫敢有其寶玉如彼  
傳舍敢治其居屋東海孝婦吏寃殺之天實寃之殺吏  
可也東海之人於婦何辜而三年旱之刺史性愚治或  
不至癘其身可也絕其命可也吉福殃惡止當其身胡  
為降旱毒彼百姓謹書誠懇本之於天神能格天為我  
升聞

鄭州祈雨文

李商隱

年月日鄭州刺史李某謹請茅山道士馮角禱請於水

府真官伏以旱魃為虐應龍不興困杲日於詩人苦密  
雲於易象生物斯瘁民食攸艱某叨此分憂俯慚無政  
爰求真休虔禱陰靈減哺表勤褰帷引咎伏乞下通榮  
播上導天潢合為膏澤之原用息蘊隆之患其於効信  
敢或逡巡暴露託詞焦勞結慮泉間候氣樹杪占風唯  
望玉女之披衣敢駭商羊之鼓舞竊希玄感聽察丹誠

農夫禱 劉軻

丙戌歲大饑楚之南江黃為甚明年予將之舒途出東

山見老農輩鳩其族為禱於伍君祠其意誠而辭俚因  
得其文以潤色之亦以倣於百執事者云農夫某謹達  
精誠於明神吁嗟我耕食之人誰非土之人人之有求  
神得不以聰明正直聽之耶曩者仍歲薦饑人為鰥嫠  
田無耕夫桑無蠶姬癘疫瘡痍一方尤危踵以吳蜀弄  
兵吏呼其門毆荒餘之人挾弓持戟女子生別行啼走  
哭王師有征羣盜繼誅乃歸其居乃復室廬廬壞田蕪  
亦莫蠲其租今之收合餘燼人百其力幸大成於秋誠



慮旱而不雨既雨而潦必不為潦又慮其不苗不秀秀而不實又慮為螟蝗又慮夫廐馬之奪其食賦吏之厚其歛焉嗚呼必馬無厭粟者妾無厭羅紈者吾歛其薄矣亦於何厚其所薄耶伏希明神無有所忽禱曰無瘠農人以肥廐馬無寒蠶婦以暖妾妓無銷耒耜以滋兵刃農人不饑而天下肥蠶婦不寒而天下安耒耜不銷而天下饒妾暖而嬌兵滋而殘馬肥而豪不蹟不駝足食足衣皇天皇天胡忍是為苟不此為民其嘻嘻神其

怡怡尚饗

祝牛宮辭

陸龜蒙

冬十月耕牛為寒築宮納而阜之建之前日老農請乞  
靈於土官以從鄉教予勉之而為之辭

四將三牯中一去乳天霜降寒納此室處老農拘拘度  
地不畝東西幾何七舉其武南北幾何丈二加五偶楹  
當閒載尺入土太歲在亥餘不足數上締蓬茅下遠官  
府耕耨以時飲食得所或寢或訛免風免雨宜爾子孫

實我倉庾

求雨文 宋歐陽修

年月日乾德縣令歐陽修謹以清酌庶羞之奠祭於五龍之神曰百里之地一時而不雨則民被其災者數千家然則水旱重事也天之庇生斯民者豈欲輕為之乎不幸而遭焉則歸其說於二者一曰吏之貪戾不能平民而使怨吁之氣干於陰陽之和而然也一曰凡山川能出雲為雨者皆有神以主之以節豐凶而為民之司

命也故水旱之災不以責吏則以告神嗚呼民不幸而罹其災修與神又不幸而當其事者以吏食其祿而神享其祀也今歲旱矣吏雖愚尚知恐懼而奔走神至靈也得不動於心乎尚饗

滁州祭城隍神文 歐陽修

雨之害物多矣而城者神之所職不敢及他請言城役用民之力六萬九千工食民之米一千三百石衆力方作雨則止之城功既成雨又壞之敢問雨者於神誰尸

吏能知人不能知雨惟神有靈可與雨語吏竭其力神  
祐以靈各供其職無媿斯民

滁州修城祈晴祭五龍文

歐陽修

雨澤於物博哉其利及其過差患亦不細民勞於農將  
熟而敗吏勤於職已成而圮龍與吏民何怒何戾山湫  
有祠樂可潛戲宜安爾居靜以養智冬雪春雨其多已  
太浸潤收畜足支一歲旱則來告否當且待

告峨山龍湫文

劉因

嗚呼一邦之望有岷惟山山之精深聚而淵泉山川惟  
形有神棲之雲雷雨露神實司之今是邦之凶旱極矣  
豈神之靈坐視而不恤哉蓋雨暘之數出於天非神之  
所得專也雨暘之咎由於人非神之所得而釋也是以  
使神函蓄靈潤雖欲發之而不得也雖然山川之神受  
命於天而主佑下民者也今欲祐之而不得矣則當為  
之請命於天昭昭在上安有不從由是言之神雖欲無  
責而烏得無責也且小民至愚窮且極矣而無所歸誠

則惟淫昏之鬼是求夫淫昏之鬼乃神之所當屏黜而  
下民之衷亦神之所當誘相也今氣運已窮矣窮則必  
通或天降之雨則小民必歸功於淫昏之鬼而惑信愈  
篤孰能禁之今是邦之大夫致禱於神則是禱其所當  
禱矣既禱其所當禱而當禱之神能隨其禱而應之以  
雨使既足而又周浹焉庶小民之愚知天地之間自有  
名山大川之正神實能闔闢陰陽而神妙造化而境內  
吏民之所當敬修其壇壝潔其牲幣而事之而向之所

謂淫昏之鬼者真不足信矣如是則人情世教或自此而變之則鬼神之惠又不但一雨而已矣如其不然則是雲雷之澤神其不可司之旱乾之虐神實不恤之天命之職可怠而曠之惑邪之俗可助而成之又何望焉又何望焉敢告

里社祈晴文

明方孝孺

民之窮亦甚矣樹藝畜牧之所得將以厚其家而吏實奪之既奪於吏不敢怨怒而庶幾償前之失者望今歲



之有秋也而神復罰之嘉穀垂熟被乎原隰淫雨暴風  
旬月繼作盡撲而將之今雖已無可奈然遺粒委穗不  
當風水衝者猶有百十之可冀神曷不亟訴於帝而遏  
之吏貪肆而昏冥視民之窮而不恤民以其不足罪固  
莫之罪也神聰明而仁閔何乃效吏之為而不思拯且  
活之民雖蠢愚不能媚順於神然春秋報謝以荅神貺  
者苟歲之豐未嘗敢怠使其靡所得食則神亦有不利  
焉天胡為而不察之民之命懸於神非若吏之暫而居

忽而代者之不相屬也隱而不言民則有罪知而不恤  
其可與否神尚決之敢告

文章辨體彙選卷三十四

欽定四庫全書

文章辨體彙選卷三十五

明 賀復徵 編

祝文四 報辭

周祭天辭

皇皇上天照臨下土集地之靈降甘風雨庶物羣生各  
得其所靡今靡古維予一人某敬拜皇天之祐

周祭地辭

薄薄之土承天之神興甘風雨庶卉百穀莫不茂者既安且寧維予一人某敬拜下土之靈

潮州祭城隍神文

唐韓愈

維年月日潮州刺史韓愈謹以柔毛剛鬣清酌庶羞之奠祭於城隍之神間者以淫雨將為人災無以應貢賦供給神明上下獲罪罰之故乃以六月壬子奔走分告乞晴於爾明神明神閔人之不辜若饗若荅冀除天地山川清風時興白日顯行蠶穀以登人不咨嗟惟神之

恩夙夜不敢忘怠謹卜良日躬率將吏薦茲血毛清酌  
嘉羞侑以音聲以謝神貺神其饗之

潮州祭界石神文 韓愈

維年月日潮州刺史韓愈謹遣耆壽成寓以清酌少牢  
之奠告於界石神之靈曰惟封部之內山川之神克庥  
於人官則置立室宇備具服器奠饗以時淫雨既霽蠶  
穀以成織婦耕男忻忻衍衍是神之庥庇於人也敢不  
明受其賜謹選良月吉日齋潔以祀神其鑒之尚饗

潮州祭太湖神文 韓愈

維年月日潮州刺史韓愈謹以清酌庶羞之奠祭於太湖之神惟神降依茲土以庇其人今茲無有水旱雷雨風火疾疫為災各寧厥宇以供上役長吏免被其譴賴神之德夙夜不敢忘謹具食飲躬齋洗奏音聲以獻以樂以謝厥賜不敢有所祈尚饗

祭木瓜神文 杜牧

維會昌六年歲次丙寅某月日某官某敬告於木瓜山

之神惟神聰明格天能降雷雨郡有災旱必能救之前  
後刺史祈無不應去歲七月苗將萎死禱神之際甘雨  
隨至槁然凶歲化為豐年仰神之靈感神之德願新祠  
宇以崇祭祀今易卑隘變為華敞正位南面廟貌嚴整  
風雷雲雨師伯必備侍衛旗戟羅列森然惟神繫雲在  
襟貯雨在正視人如子渴即與之不容凶荒不降疾疫  
千萬年間使池之人敬仰不怠伏惟尚饗

賽舜廟文

李商隱



年月日昭賽虞舜之祠伏以帝狩南方神留下土翠華  
莫返積怨望於他年大麓不迷烜威靈於終古比憂嘉  
種少昌憊陽抗簡陳詞潔罇引咎果蒙憑離掣電跨吳  
揚風布沾渥於九臯起焦枯於一瞬敢布瑤席輒事蘭  
羞帝其罷奏南琴停吹西琯使東皇太一兼預於靈遊  
俾山鬼江婁無藏於沴氣庶將善政以奉明輝

賽越王神文

李尚隱

年月日賽於越王之神惟神耀焯殊姿抑揚竒表秦魚

既爛則聊帝南荒漢鹿有歸則稱臣北闕覽英雄之載  
籍信王霸之朋遊言念遺祠猶存塵色尚興甘雨以救  
公田敢陳沼沚之毛用報京坻之積神其永司此土長  
庇吾人福祐柔良驅除疾癘今來古往常教威著越城  
萬歲千秋勿使蒐歸真定神乎不昧來鑒斯言

祭梓潼神君文

孫樵

大中十八年七月九日鄉貢進士孫樵再拜獻辭張君  
靈座之前樵實頑民不知鬼神凡過祠廟不笑即嚔今

於張君信有靈云會昌五年夜躋此山凍雨如泣滑不  
可涉滿眼漆黑索途不得跋馬愠僕前仆後踣樵因有  
言非燭莫前須臾有光來馬足間北望空山火起廟孺  
焰焰逾丈飛芒射天暝色斜透峻途如晝樵謂廟奴若  
寒爇薪取溫曉及山顛鑠澁廟門餘燼莫覩孰知其然  
大中四年冒暑還秦午及山足猛雨如電樵復有言神  
誠能神反雨為晴曩火乃靈斯言纔闕迴風大作始自  
馬前怒號滿山劈雲飄雨使四山去茲山巍巍輕塵如

飛訖四十里雨不需衣顧樵當時嘉神不欺與神心期  
神其自知今過祠宇其敢默去觴酒豆脯捧拜庭下神  
其歆此

汝州謝雨文 宋蘇轍

紹聖元年歲次甲戌四月壬寅朔二十六日丁卯大中  
大夫知汝州軍州事護軍蘇轍謹以清酒特羊之奠恭  
祭於北園社令后土神若轍以罪戾謫守茲土自春徂  
夏旱饑為苦麩麥殄悴禾未出畝吾民憂傷巫覡旁午

念予罪人餘譴累汝間行北園亭曰致雨前守趙王有  
禱咸許顧慚昔賢願躡前武掃地而祭屏去牖戶清漪  
繞屋喬木環堵微風蕭然神物來處吾僚祇敬齋宿吾  
府雲興山際倏遍天宇風來不疾雷發不怒祈祈甘澤  
如脯如乳酒不濡池雁不升俎仁哉有神未請而予再  
宿告晴高下咸溥朝陽既升鉏耨畢舉宿麥斯實施及  
禾黍吏免訶譴民病獲愈念惟始至神則何取祇薦醪  
牲以永斯祐尚饗

祠山謝雨文

葉適

迺五月乙酉雨晝夜不止百泉交趨千壑並至或耘其  
前歌長以謠或播其後笑而忘號擔牲挈壺敬謝明德  
伊苗有穉維稼之穡

文章辨體彙選卷三十五

欽定四庫全書

文章辨體彙選卷三十六

明 賀復徵 編

祝文五

嘏辭 祝辭附

嘏辭

徐師曾曰按嘏者祝為尸致福於主人之辭記所謂嘏以  
慈告者也辭見儀禮其他文集不載惟蔡中郎集有之

周祭禮嘏辭



皇尸命工祝承致多福無疆於女孝孫來女孝孫使女受祿於天宜稼於田眉壽萬年勿替引之

漢九祝嘏辭

漢蔡邕

高皇帝使工祝承致多福無疆於爾嗣曾孫皇帝使爾受祿於天宜此舊都萬國和同兆民康乂眉壽萬年子子孫孫永守民庶勿替引之

越羣臣祝辭

附

越王勾踐五年與大夫種范蠡入臣於吳羣臣皆送

至浙江之上臨水祖道軍陣固陵大夫前祝其辭曰  
皇天祐助前沈後揚禍為德根憂為福堂威人者滅服  
從者昌王離牽致其後無殃君臣生離感動上皇衆夫  
悲哀莫不感傷臣請薄脯酒行二觴

其二

大王德壽無疆無極乾坤受靈神祇輔翼我王厚之祉  
祐在側德銷百殃利受其福去彼吳庭來歸越國

文種祝越王辭

附

越王既滅吳霸諸侯置酒文臺羣臣為樂大夫種進  
祝酒其辭曰

皇天祐助我王受福良臣集謀我王之德宗廟輔政鬼神承翼君不忘臣臣盡其力上天蒼蒼不可掩塞觴酒  
二升萬福無極

其二

我王仁賢懷道抱德滅讐破吳不忘返國賞無所吝羣  
邪杜塞君臣同和福祐千億觴酒二升福歲難極



文章辨體彙選卷三十六

欽定四庫全書

文章辨體彙選卷三十七

明 賀復徵 編

祝文六

冠昏辭

祭射侯辭附

周成王冠祝辭

家語云武王崩成王年十三嗣立周公攝政以治天下冠成王而朝於祖以見諸侯周公使祝雍作頌命之曰祝辭達而勿多也辭曰

使王近於民遠於佞嗇於時惠於財親賢使能

佞叶彌  
因反財

能叶前西反  
叶音泥

### 士冠禮辭

始加祝辭

士冠始加細布  
冠服玄端爵鞞

令月吉日始加元服棄爾幼志順爾成德壽考惟祺介

爾景福

服叶蒲北反  
福叶肇助反

再加

再加皮弁服  
素積素鞞

吉月令辰乃申爾福敬爾威儀淑慎爾德眉壽萬年永

受胡福

三加

三加爵弁服  
纁裳鞅鞿

以歲之正以月之令咸加爾服兄弟具在以成厥德黃

耆無疆受天之慶

叶墟羊反

醴辭

三加卑賓  
醴冠者

甘醴惟厚嘉薦令芳拜受祭之以定爾祥承天之休壽

考不忘

醴辭

若不醴則醴注醴醴簡尚質也醴禮繁尚  
文也醴亦賓醴冠者冠有三加故三醴也



旨酒既清嘉薦亶時始加元服兄弟其來孝友時格永

乃保之

來叶乃之切

再醑

旨酒既滑嘉薦伊脯乃申爾服禮儀有序祭此嘉爵承

天之祐

三醑

旨酒令芳籩豆有楚咸加爾服肴升折俎承天之慶受

福無疆

字辭

既醮冠者見  
母出賓字之

禮儀既備令月吉日昭告爾字爰字孔嘉髦士攸宜宜

之於假永受保之曰伯某父

備叶筆力反字叶茲  
嘉叶居之反假叶古

士昏禮辭

父命子辭

往迎爾相承我宗事勗帥以敬先妣之嗣若則有常

父命女辭

戒之敬之夙夜毋違命

母命女辭

勉之敬之夙夜無違宮事

庶母命女辭

敬恭聽宗爾父母之言夙夜無愆視諸衿鞶

冠子祝文

梁沈約

蠲茲今日元服肇加成德既舉童心自化行之則至無  
謂道賒敦以秋實敷以春華無恥下問乃致高車子孫  
千億廣樹厥家

字朱子祝詞 宋劉子輦

冠而欽名粵惟古制朱氏子熹幼而騰異交朋尚焉請  
祝以字字以元晦表名之義木晦於根春容曠敷人晦  
於身神明內腴昔者曾子稱其友曰有若無實若虛不  
斥斲名而傳於書雖百世之遠也揣其氣象知顏氏如  
愚迹叅並遊英馳俊驅豈無他人夫誰敢居自諸子言  
志回欲無伐一宣於聲終身弗越陋巷暗然其光烈烈  
從事於茲惟參也無慚貫道雖一省身則三夾輔孔門

翱翔兩驂學的欲正吾知斯之為指南惟先吏部文儒  
之粹彪炳育珍又華其繼來茲講磨融融熹熹真聰廓  
開如源之方駛望洋渺瀰老我縮氣古人不云乎純亦  
不已悵有道之衰變切切而唯唯予德不日新則時予  
之恥勿謂此耳充之益充借曰合矣宜養於蒙言而思  
愆動而思躓凜乎惴惴惟曾顏是畏

祭侯辭

考工記曰梓人為侯張皮侯而棲鵠則春以功張五

采之侯則遠國屬張獸侯則王以息燕祭侯之禮以  
酒脯醢其辭曰

惟若寧侯毋或若女不寧侯不屬於王所故抗而射女

強飲強食貽女曾孫諸侯百福

侯之為物捍內蔽外有諸侯之象焉故假以為

戒敕諸侯之辭言汝當安為諸侯毋如此等不寧之侯不屬服於天子之所故立而射之也強飲強食祝神之辭勉之使飲食也既飲食醉飽當以百福遺女曾孫之為諸侯也

文章辨體彙選卷三十七

欽定四庫全書

文章辨體彙選卷三十八

明 賀復徵 編

祝文七

玉牒

青詞

數佛

數道

玉牒文

徐師曾曰按玉牒文者封禪告天之文也世傳夏禹  
玉牒辭蓋後人附會之文耳自司馬相如勸帝封禪  
故有玉牒傳於今然其事不經明主所不為也姑錄



其文以備一體 沈芬曰史稱玉牒之辭秘不可得  
覽宋玉牒文亦祈告之辭耳豈秦漢以前或不類此  
夏禹玉牒辭

祝融司方發其英沐日浴月百寶生

宋真宗封祀玉牒文

維大宋祥符元年歲次戊申十月戊子朔二十四日辛亥有  
宋嗣天子臣某敢昭告於昊天上帝啟運大同維宋受命太  
祖開階功成治定太宗膺圖重熙累盛粵維沖人不承列聖

寅恭奉天憂勞聽政一紀於茲四隩來暨玄貺殊尤禎符章  
示儲慶發祥清淨可致時和年豐羣生咸遂爰荷顧懷敢忘  
繼志僉議大封聿伸昭事躬陟喬嶽對越上玄率禮祇肅備  
物吉蠲以仁守位以孝奉先祈福速下侑神昭德惠綏黎  
元懋建皇極天祿無疆靈休允迪萬乘其昌永保純錫

青詞

太清宮祈雪青詞

唐封敕

維年月日嗣皇帝臣稽首大聖祖高上大道金闕玄元

天皇大帝伏以百穀實生靈之本萬姓為國家之基言  
念老農常思薄德今時雪罕降宿麥是憂同雲未施嘉  
穀何望臣祇應景運亭育兆人德不動天言徒罪已深  
盛慮闕於明薦災沴恐及於生靈誠極齋莊禮虔夙夜  
伏惟玄功不宰至道無言垂福祐於羣生假膏濡之德  
澤謹遣尚書兵部侍郎高元裕啓告以聞謹詞

兗州會真宮等處開啟皇帝本命道場青詞

宋歐

陽修

伏以三辰昭運六甲馴行當薰風阜育之時屬正命本  
元之日謹遵科式上薦誠明誦琳藻之真文延紫清之  
諸聖伏冀蒼靈降鑒福淑駢臻蒙休匪止於眇躬博施  
咸均於庶品

歎佛文

為太平公主五郎病愈設齋歎佛文

唐宗之問

至矣哉釋迦之本願也念發於大悲業成於廣濟代俗  
以積迷為用有感斯通衆生以諸病作身至誠能愈我

鎮國太平公主娥靈襲彩女曜聯英戒環佩於中閨邑  
山河於外館位彌高而跡彌下保是洪猷身日貴而心  
日微由乎夙植全其忠孝頌美於家邦宜爾子孫理歸  
於福壽第五子某官某才光性與慧發生知山桂含芳  
而逼人階蘭吐秀而驚俗頃以寒暄稍改保攝微乘留  
卧玳瑁之牀陪侍鳳凰之宇公主上祈妙福蒙降慈恩  
漢賜黃金還依膝下隋珍明月再入掌中今者上報慈  
恩大張名供於是披甲第闢梵筵幢蓋乘空而下來龍

象接武而爰集迴供絕阨之國求饌香積之宮麵為丘  
而蔽庭酪為沼而環砌龍王獻水噴車馬之埃塵天女  
散花綴山林之草樹無邊之施下飽於三塗普救之心  
傍寬於六趣伏願以斯妙福上薦聖朝應天皇帝長保  
金圖永臨璿極九族既睦祛其有漏之緣萬人以安不  
捨無生之見順天皇后慶垂椒掖德盛蘭宮國風流洽  
於鵲巢坤儀光贊於龍宸皇太子業躋聖敬本固元良  
諸王公主等擢秀本枝崇榮湯沐三槐九棘庶職羣僚

咸維赤縣之圖共翼青雲之紀備該空有遍燭幽明俱  
超解脫之津永拔輪回之地

為崔常侍第十五娘子奉詔落髮讚佛文

王維

竊以真如妙宰具十方而無成涅槃至功滿四生而不  
度故無邊大照不照得空有之淵萬法偕行無行為滿  
足之地惟茲化佛即具三身不捨凡夫本無五蘊實藉  
津梁相去脫落塵容始於度門漸於空舍然後金剛道  
備為三界大師玉毫光相得一生補處左散騎常侍攝

御史中丞崔公第十五娘子於多劫來植衆德本以殷  
若力生菩提家舍哺則外葷羶勝衣而斥珠翠教從半  
字便會聖言戲則剪花而為佛事常侍公頃以入朝天  
闕尚簡帝心雖功在於生人深辭拜命願賞延於愛女  
密啓出家白法宿修紫書方降即令某月日敬對三世  
諸佛十方賢聖稽首合掌奉詔落髮久清三業素成菩  
薩之心新下雙鬟如見如來之頂綺繡方解樹神獻無  
價之衣香飯當消天王持衆寶之鉢惟娘子舍諸珍寶



塗彼戒香在微塵中見億佛刹如獻珠頃具大神通伏  
願以度人設齋功德上奉皇帝聖壽無疆記椿樹以為  
年土宇無垠包蓮花而為界又用莊嚴常侍公出為法  
將入拜台臣身在百官之中心超十地之上夫人以文  
殊智本是法王在普賢心長為佛母郎君娘子等住誠  
性為孝順用德為道場將遍衆生之慈迥同一子之想  
又願普同法界盡及有情共此勝因俱登聖果

歎道文

憲宗忌日玉宸觀歎道文

白居易

清淨無為之謂道是非有作之謂名道知其源名亦歸  
正由是羣生遂性成臻妙有之功四氣順時自契不言  
之信洪鑪假喻大塊無形載厚地以繁滋覆高天而悠  
久伏以今月二十七日憲宗皇帝忌女道士等齋戒精  
修焚香虔懇伏願追縱玄運息駕黃庭保聖祚於無疆  
降神功於有感日月所照福祐同霑

文章辨體彙選卷三十八

欽定四庫全書

文章辨體彙選卷三十九

明 賀復徵 編

祝文八

上梁文

景靈宮修葺英宗皇帝神御殿上梁文

宋 王安石

兒郎偉天都左界帝室中經誕維僊聖之祠夙有神靈  
之宅嗣開宏構追奉眸容方將廣舜孝於無窮豈持尚  
漢儀之有舊先皇帝道該五泰德貫二儀文摛雲漢之

章武布風霆之號華夏歸仁而砥屬蠻夷馳義以駿奔  
清蹕甫傳靈輿忽往超然姑射山無一物之疵邈矣壽  
丘臺有萬人之畏已葵鼎湖之弓劍將游高廟之衣冠  
今皇帝孝奉神明恩涵動植纂禹之服期成萬世之功  
見堯於羹未改三年之政乃眷熏修之吉壤載營館御  
之新宮考協前彛述追先志孝嚴列峙寢門可象於平  
居廣拓旁開輦路故存於陳迹官師肅給斤築隆施揆  
吉日以庀徒舉修梁而考室敢申善頌以相歡謔

兒郎偉拋梁東聖主迎陽坐禁中明似九天昇曉日恩  
如萬國轉春風

兒郎偉拋梁西瀚海兵銷太白低王母玉環方自獻大  
宛金馬不須齋

兒郎偉拋梁南內地星高每歲占千障滅烽開嶺徼萬  
艘輸費引江潭

兒郎偉拋梁北邊城自此無鳴鏑即看呼韓渭上朝休  
誇實憲燕然勒

兒郎偉拋梁上彷彿神遊今可想風馬雲車世世來金輿玉笋年年享

兒郎偉拋梁下萬靈隕祉扶宗社天垂嘉種已豐年地產珍符方極化

伏願上梁之後聖躬樂豫寶命靈長松茂獻兩宮之壽椒繁占六寢之祥宗室藩維之彥朝廷表幹之良家傳慶譽代襲龍光有一心而顯相保饋祝之無疆皇帝萬歲

醴泉觀本觀三門上梁文 歐陽修

兒郎偉我國家膺三靈之眷命革五代之荒屯多壘削  
平包干戈而偃武四夷面內解辮索以承風逮先聖之  
撫臨躋羣生於富壽乃欲追義軒以並軌歟云亭而勒  
成容典交修遂舉曠古難行之禮瑞應來集有非人力  
可致之祥卿雲喬露之光紛綸而雜委朱草靈芝之秀  
焜燿而叢生爰有神泉湧茲福地甘如飲醴美可蠲疴  
湛靈液以淵淳敬琳宮而崛起歲時遊豫順民俗之樂



康棟宇翼嚴表京師之壯麗近以有司不謹飛焰延災  
皇上愛物推仁因民所利顧遺基之歸爾回聖慮以惻  
然爰飭良工載新有作損其土木之費所以寬民適其  
奢儉之中俾之可久用涓吉日構此修梁盍効歡謳形  
於善祝

兒郎偉拋梁東危構岩堯彩露中欲識聖君仁及物靈  
源一勺本無窮

兒郎偉拋梁西金碧相輝俯仰迷萬瓦寒光浮瑞靄層

簷晚景掛晴蜺

兒郎偉拋梁南善利深功不可談但喜斯民無疾癘誰  
知靈液有餘甘

兒郎偉拋梁北觀者如雲來九陌四方萬國會京師有  
類衆星環斗極

兒郎偉拋梁上棟宇規模標大壯落成行即慶良辰望  
幸何時來綵仗

兒郎偉拋梁下祈福為民崇廣廈四時和氣致休祥萬

國多歡洽朝野

伏願上梁以後三辰順軌百穀豐登卉服雕題咸被垂  
衣之化行歌戴白永為擊壤之氓皇帝萬歲皇帝萬歲  
皇帝萬歲萬歲

披雲樓上梁文

陳師道

夙夜在公必有燕休之地上下同樂孰知興作之勤惟  
此東州稱為輔郡遺澤未息猶有陶虞之風王化既成  
更同齊魯之俗河山千里枹鼓不鳴閭巷百年豪傑間

出地滋墾闢歲嗣豐穰里無愁歎之聲吏絕追呼之擾  
因斯時之暇豫樂此地之登臨華故增高事非過制斷  
長續短費不及民棟宇靚深稱吏民之觀望歲時遊豫  
遂老幼之歡娛爰歷靈辰用興危祭聽於輿頌落此成  
功

拋梁東日上雲開四顧中今代功名歸二老當年富貴  
有朱公

拋梁南舳艫銜尾繫江潭朝濟已作豐年雨暑飲行聽

百少日九二二  
卷三十九  
抵掌談

拋梁西陰陽桃李下成蹊舉頭更覺長安近送酒長隨  
落日低

拋梁北瑞塔亭亭入雲矗百年戰鬪及明時千里河山  
餘故國

拋梁上危架岩堯遠十丈房星璀璨近簷楹海岱推藏  
但空曠

拋梁下割肉成堆酒如瀉燕雀投人也自忙鼠蝠旋墻

不容鑄

伏願上梁以後人神同力暘雨以時水宿塗行夜無風  
露之警盆縲鎌割家有橐廩之餘囹圄一空鞭笞不試  
商旅四集貨賄遂通據榻以談不減庾公之興從遊而  
賦尚須韓子之文



文章辨體彙選卷三十九

欽定四庫全書

集部

文章辨體彙選卷四十二

詳校官中書臣金應珩

主事銜臣徐以坤覆勘

總校官檢討臣何思鈞

校對官編修臣勵守謙

謄錄監生臣任嘉春



欽定四庫全書

文章辨體彙選卷四十

明 賀復徵 編

盟

劉勰曰盟者明也駢毛白馬珠盤玉敦陳辭乎方明之下祝告於神明者也夫盟之大體必序危機獎忠孝共存亡戮心力祈幽靈以取鑒指九天以為証感激以立誠切至以敷辭此其所同也然非辭之難虞

辭為難後之君子宜存殷鑒忠信可矣無恃神焉

徐師曾曰按禮記蒞物曰盟三代盛時初無詛盟雖有要誓結言則退而已周衰人鮮忠信於是刑牲歃血要質鬼神而盟繁興然義存則克終道廢則渝始亦存乎人焉耳

周襄王盟諸侯於踐土

王子虎

襄王二十年晉文公敗楚於城濮襄王下勞晉作王宮於踐土而獻楚俘於王王命尹氏及王子虎內史

叔興父策命文公為伯王子虎盟諸侯於王庭要言  
曰

皆獎王室無相害也有渝此盟神明殛之俾隊其師無  
克胙國及其子孫無有老幼

晉文公盟衛人於宛濮

衛甯俞

周襄王二十年晉文公伐衛衛成公請盟弗許二十  
一年成公使元喧奉叔武受盟於踐土遂復成公甯  
武子與衛人盟於宛濮曰

天禍衛國君臣不協以及此憂也今天誘其衷使皆降  
心以相從也不有居者誰守社稷不有行者誰扞收圉  
不協之故用昭乞盟於爾大神以誘天衷自今日以往  
既盟之後行者無保其力居者無懼其罪有渝此盟以  
相及也明神先君是糾是殛

晉楚合盟於宋

晉士燮

周簡王四年晉遣鍾儀歸求成楚使公子辰如晉以  
報鍾儀之使五年晉使糴茂如楚以報公子辰之使

景公卒不克作好會宋華元善於楚令尹子重子重  
又善於晉欒武子去年華元如晉楚至是用克合二  
國之成盟於宋西門之外曰

凡晉楚無相加戎好惡同之同恤菑危備救凶患若有  
害楚則晉伐之在晉楚亦如之交贄往來道路無壅謀  
其不協而討不庭有渝此盟明神殛之俾隊其師無克  
胙國

晉鄭同盟於戲

周靈王八年諸侯伐鄭鄭人行成同盟於戲晉士莊子為載書曰

自今日既盟之後鄭國而不唯晉命是聽而或有異志者有如此盟

鄭公子駢趨進云云荀偃曰改載書公孫舍之曰昭大神要言焉若可改也大國亦可叛也乃盟而還

天禍鄭國使介居二大國之間大國不加德音而亂以要之使其鬼神不獲歆其禋祀其民人不獲享其土利

夫婦辛苦墊隘無所底告自今日既盟之後鄭國而不  
唯有禮與強可以庇民者是從而敢有異志者亦如之

晉鄭同盟於亳

晉士匄

周靈王十年晉悼公會諸侯伐鄭鄭人懼乃行成同  
盟於亳載書曰

凡我同盟毋蘊年毋壅利毋保奸毋留慝救災患恤禍  
亂同好惡獎王室或間茲命司慎司盟名山名川羣神  
羣祀先王先公七姓十二國之祖明神殛之俾失其民

隊命亡氏蹈其國家

討董卓盟

洪臧洪

漢室不幸皇綱失統賊臣董卓乘釁縱害禍加至尊虐  
流百姓大懼淪喪社稷剪覆四海兗州刺史岱豫州刺  
史由陳留太守邈東郡太守瑁廣陵太守超等糾合義  
兵並赴國難凡我同盟齊心戮力以致臣節殞首喪元  
必無二志有渝此盟俾墜其命無克遺育皇天后土祖  
宗明靈實皆見之



漢吳同盟

黃龍元年六月蜀遣衛尉陳震慶權踐位權乃參分天下豫青徐幽屬吳兗冀并涼屬蜀其司州之土以函谷關為界造為盟曰

天降喪亂皇綱失叙逆臣乘釁劫奪國柄始於董卓終於曹操窮凶極惡以覆四海至今九州幅裂普天無統民神痛怨靡所戾止及操子丕桀逆遺醜薦作姦回偷取天位而叡么麼尋丕凶蹟阻兵盜王未伏厥誅昔共

工亂象而高辛行師三苗干度而虞舜征焉今日滅虜禽其徒黨非漢與吳將復誰在夫討罪翦暴必聲其罪宜先分裂奪其土地使士民之心各知所歸是以春秋晉侯伐衛先分其田以畀宋人斯其義也且古建大事必先盟誓故周禮有司盟之官尚書有告誓之文漢之與吳雖信由中然分土裂境宜有盟約諸葛丞相德威遠著翼戴本國典戎在外信感陰陽誠動天地重復結盟廣誠約誓使東西士民咸共聞知故立壇殺牲昭告

神明再軟加書副之天府天高聽下靈威渠謔司慎司  
盟羣神羣祀莫不臨之自今日漢吳既盟之後戮力一  
心同討魏賊救危恤患分災共慶好惡齊之無有攜貳  
若有害漢則吳伐之若有害吳則漢伐之各守分土無  
相侵犯傳之後葉克終若始凡百之約皆如載書信言  
不豔寶居於好有渝此盟創禍先亂違貳不協悞慢天  
命明神上帝是討是督山川百神是糾是鉅俾墜其師  
無克胙國於爾大神其明鑒之

與段匹碑盟文 晉劉琨

天不靜晉難集上邦四方豪傑是焉扇動乃憑陵於諸  
夏俾天子播越震蕩固有攸底二虜交侵區夏將泯神  
人之主蒼生無歸百罹備臻死喪相枕肌膚甚於鋒鏑  
骸骨暴於草莽千里無烟火之盧列城有兵曠之邑茲  
所以痛心疾首仰訴皇穹者也臣琨蒙國寵靈叨竊台  
岳臣殫世効忠節忝荷公輔大懼醜類猾夏王旅隕首  
喪元古先哲王貽厥後訓所以翼戴天子敦序同好者

莫不臨之以神明結之以盟誓故齊桓會於召陵而羣  
后加恭晉文盟於踐上而諸侯滋順如臣等介在遐鄙  
而與主相去迥遠是以敢干先典刑牲軟血自今日既  
盟之後皆盡忠竭節以剪夷二寇有加難於殫現必救  
加難於琨碑亦如之繼繼齊契披布胸懷書功金石藏  
於王府有渝此盟亡其宗族俾墜軍旅無其遺育

唐穆宗與吐蕃使盟

穆宗長慶元年吐蕃以我與回紇和親犯青塞堡鹽

州刺史李文悅發兵進擊之吐蕃遣使請盟帝許之  
維唐承天撫有八紘聲教所臻靡不來庭兢業齊栗懼  
其隕顛纘武紹文疊慶重光克彰濬哲罔忝洪緒十有  
二葉二百有四載則我太祖權明號而建不拔鋪鴻名  
而垂永久類上帝以答嘉應享皇靈以酬景福曷有怠  
已越歲在癸丑冬十月癸酉文武孝德皇帝詔丞相臣  
植臣播臣元穎等與大將和蕃使禮部尚書訥羅論等  
會盟於京師壇於城之西郊坎於壇北凡讀誓刑牲加

書復壤陟降周旋之禮動無違者蓋所以偃兵息人崇  
姻繼好懋建遠畧規恢長利故也原夫昊穹上臨黃祇  
下載茫茫蠢蠢之類必資官司為厥宰臣苟無統紀則  
相滅絕中夏見管維唐是君西裔一方大蕃為主自今  
而後屏去兵革宿忿舊惡廓焉消除追崇勇甥曩昔結  
援邊堠撤警藏烽韜烟患難相卹暴掠不作亭障旣脫  
絕其交浸襟帶要害謹守如故彼無此詐此無彼虞嗚  
呼愛人為仁保境為信畏天為知事神為禮有一不至

構災於躬塞山崇崇河水湯湯日吉辰良奠其兩疆西  
為大蕃東實巨唐大臣執簡布告秩方

文章辨體彙選卷四十



欽定四庫全書

文章辨體彙選卷四十一

明 賀復徵 編

誓

徐師曾曰按誓者誓衆之辭也蔡沈云戒也軍旅曰誓古有誓師之辭如書稱禹征有苗誓於師以及甘誓湯誓泰誓收誓費誓是也又有誓告羣臣之辭如書秦誓是也後世俱不多見又曰誓者約信之辭也

其體與盟同

周公旦伐東誓文

武王即位九年欲修文王業東伐討以觀諸侯集否  
師行師尚父誓曰

蒼兕蒼兕總爾衆庶與爾舟楫後至者斬

蒼兕馬融云主舟楫官名

王充云水獸九頭誓衆令急濟故言蒼兕以懼之

誓師 晉趙鞅

周敬王二十七年晉伐鄭簡子誓曰

范氏中行氏反易天明斬艾百姓欲擅晉國而滅其君  
寡君恃鄭而保焉今鄭為不道棄君助臣二三子順天  
明從君命經德義除詬恥在此行也克敵者上大夫受  
縣下大夫受郡士田十萬庶人工商遂人臣隸圉免志  
父無罪君實圖之若其有罪絞縊以戮桐棺三寸不設  
屬辟素車樸馬無入於兆下卿之罰也

### 越王誓國

勾踐卑事夫差與官士三百人入吳勾踐之地南至

於句無北至於禦兕東至於鄞西至於姑蔑廣運百里乃致其父兄昆弟而誓曰

寡人聞古之賢君四方之民歸之若水之歸下也今寡人不能將帥二三子夫婦以審命壯者無取老嫗令老者無取壯妻女子十七不嫁其父母有罪丈夫二十不取其父母有罪將免者以告公令醫守之生丈夫二壺酒一犬生女子二壺酒一豚生三人公與之母生二人公與之餼當室者死三年釋其政支子死三月釋其政

必哭泣葬埋之如其子令孤子寡婦疾疢貧病者納宦  
其子其達士潔其居美其服飽其食而摩厲之於義四  
方之士來者必廟禮之

### 越王誓師

越王入吳十年不收於國民居有三年之食國之父  
兄請報會稽之恥勾踐辭之父兄又請勾踐既許之  
乃致其衆而誓之曰

寡人聞古之賢君不患其衆之不足也而患其志行之

少恥也今夫差衣犀水之甲者億有三千不患其志行之少耻也而患其衆之不足也今寡人將助天滅之吾不欲匹夫之勇也欲其旅進旅退也進則思賞退則思刑如此則有常賞進不用命退則無恥如此則有常刑

漢高帝封爵之誓

非劉氏不王若有亡功非上所置而侯者天下共誅之  
唐德宗移京西戎兵備關誓文

德宗即位嚴察神斷盜不自安汴州奏以城隘狹增

築城郭李正已聞之移兵萬人屯於曹州田悅亦加  
兵河上河南大擾羽書警急乃詔移京西戎兵萬二  
千人以備關東帝御望春樓新誓師以遣之

嗚呼東鄙之警事非獲已惟爾將校羣士各以忠節勤  
於王家南赴蜀門西定涇壘甲冑不解瘡痍未平今載  
用爾分鎮於周鄭之郊敬聽明命夫王者之師有征無  
戰稽諸理道用鎮邦國宜厲乃戈甲保固城池以德和  
人以義制事將備其侵軼不用越境攻取戢而後動可

謂正矣今外夷來庭方春生植品物資始農桑是時俾爾將士暴露中野我心痛悼鬱如焚灼嗟爾有衆其咨予懷

禱

禱牙文附

復徵曰禱求也說文云告事求福也往往軍中多用之成湯禱桑林已載祝文祈辭中今錄中行獻子禱河二首以備一體

禱河

晉荀偃



平公伐齊將濟河獻子以朱絲繫玉二鼓而禱曰  
齊環怙恃其險負其衆庶棄好背盟陵虐神主曾臣虺  
將率諸侯以討焉其官臣偃實先後之苟捷有功無作  
神羞官臣偃無敢復濟唯爾有神裁之

衛太子蒯瞶禱

敬王二十七年晉人伐鄭衛太子蒯瞶謀入衛遇鄭  
師戰於鉞禱曰

曾孫蒯瞶敢昭告皇祖文王烈祖康叔文祖襄公鄭勝

亂從晉午在難不能治亂使鞅討之崩瞞不敢自佚備  
持子焉敢告無絕筋無折骨無面傷以集大事無作三  
祖羞大命不敢請佩玉不敢愛

唐建安郡王禡牙文

陳子昂

萬歲通天二年三月朔日清邊道大總管建安郡王某  
敢以牲牢告軍牙之神蓋先王作兵以討有罪奸慝竊  
命夷戎不恭則必肆諸市朝大戮原野我皇周子育萬  
國寵綏百蠻青雲千呂環入貢文有年矣契丹肆雲敢

亂天常乃蜂屯九山豕食寮野宴安鳩毒作為攬捨天  
厭其凶國用致討皇帝命我肅將王誅今大軍已集吉  
辰協應旄頭首建羽飾前列夷貊咸威將士聽誓方俟  
天休命為人殄災惟爾有神尚臧乃醜召太一會雷公  
翼白虎乘青龍星流彗掃永清朔裔使兵不血刃戎夏  
來同以昭我天子之德允神之功豈非正直克明哉無  
縱世讐以作神羞急急如律令

明澗東行中書省右丞馮牙文

胡翰

維歲甲辰正月某日朔東行中書省右丞李某以清酌  
潔牲禡於大牙之神惟國大事曰祀與戎凡我有衆罔  
敢弗恭在昔草昧誕啟武功涿鹿揚靈牧野奮庸承天  
休命惟神是崇於皇漢祖奄起沛豐申嚴秩禮丕顯軍  
容百王繼軌庶士承風伊予不武荷國委寄授越端闈  
搃干東裔列城効順羣醜慕義匪曰予能實神之賜赫  
赫靈旗道揚神威天日清照風雷厲飛睽睽萬目具瞻  
指揮何揮不耀何指不披薄海內外日所出入愴其於

鑠罔不震驚肆予將士一乃心力鞠躬將事不越咫尺  
春酒既嘉潔牲孔膄是用昭假令典有則神其監之尚  
永我翊宣我神武祚我明德削平僭亂佑我民物如周  
如漢如古有國登於至治報祀罔極

文章辨體卷四十一